

# **SWANGERSKAPBELEID**

**Die Hoërskool Tygerberg** (hierna 'die skool') en sy beheerliggaam erken die Grondwet van die Republiek van Suid-Afrika, Wet 108 van 1996 (hierna 'die Grondwet'); die Suid-Afrikaanse Skolewet, Wet 84 van 1996 (hierna 'die Skolewet'), sowel as alle toepaslike, afdwingbare departementele regulasies en beleid, wat insluit die Leerderaanwesigheidsbeleid wat ingevolge **Algemene Kennisgewing 361 van 2010, GG 33150 4 Mei 2010**, uitgevaardig is (hierna 'die Leerderaanwesigheidsbeleid'). Al voormelde is in ag geneem met die opstel van hierdie swangerskapbeleid.

## 1. Inleiding

### 1.1 Die skool:

- 1.1.1 erken die verantwoordelikheid en invloed van die Suid-Afrikaanse onderwysstelsel ten opsigte van leerderswangerskappe; en
- 1.1.2 aanvaar sy verantwoordelikheid om al sy leerders van hulle reg op onderrig in kennis te stel.

## 2. Beleidsstelling en algemene beginsels

- 2.1 Die skool is 'n sterk voorstander van seksuele onthouding onder leerders van die skool.
- 2.2 Tog sal die skool ooreenkomstig die bepalings van die Grondwet en die Skolewet nie onbillik teen swanger leerders diskrimineer nie.

3. Hantering van swangerskappe onder skoolmeisies

3.1 Enige leerderswangerskap sal vertroulik hanteer word.

3.2 Elke geval behoort deurlopend beoordeel te word ten einde die leerder se opvoedingsbelange en reg op onderrig te beskerm, behoudens die bepalings van hierdie swangerskapbeleid.

3.3 Die skoolhoof of sy/haar gedelegeerde senior vrouepersoneellid moet, in die teenwoordigheid van 'n (ander) senior vrouepersoneellid, met die leerder en/of haar ouers/voogde oorleg pleeg in geval van 'n redelike vermoede dat sodanige leerder swanger is sonder dat die skool formeel daarvan ingelig is.

4. Die leerder se verantwoordelikheid

4.1 'n Swanger leerder of 'n leerder wat rede het om te glo dat sy swanger is, moet die skool onverwyld daarvan in kennis stel. 'n Leerder wat bewus is van 'n medeleerder se swangerskap moet die skool insgelyks onmiddellik daarvan in kennis stel.

4.2 Sodra die skool van 'n leerder se swangerskap ingelig is, moet die skoolhoof of sy/haar gedelegeerde senior vrouepersoneellid met die betrokke leerder en/of haar ouers/voogde oorleg pleeg, met die versoek dat die skool voorsien word van skriftelike mediese bevestiging (met ander woorde deur 'n erkende mediese praktisyn) van die leerder se swangerskap, wat die geraamde bevallingsdatum insluit. Die skool moet ook gereelde vorderingsverslae oor die algemene gesondheid van die leerder en haar ongebore kind ontvang.

4.3 Indien dit nie moontlik is om met die ouers/voogde van die swanger leerder oorleg te pleeg nie, moet die skool die leerder na 'n geneesheer of mediese

sentrum (met ander woorde kliniek of hospitaal) verwys. Die geneesheer of professionele gesondheidspraktisyn moet die skool van 'n bewys van die leerder se swangerskap voorsien, wat die geraamde bevallingsdatum sal insluit, sowel as van gereelde vorderingsverslae oor die algemene gesondheid van die leerder en haar ongebore kind voorsien.

- 4.4 Die swanger leerder moet behoorlik ingelig word dat daar geen mediese personeel by die skool is nie, en dat geen personeellede van die skool professioneel opgelei is om enige komplikasies gedurende 'n swangerskap te hanteer nie. Die leerder moet voorts kennis neem van moontlike gesondheidsrisiko's, trauma vir haar en/of haar ongebore of pasgebore kind, sowel as die gepaardgaande moontlike uitwerking op en/of trauma vir die res van die skool.
- 4.5 Gedagtig aan bogenoemde faktore, bepaal hierdie beleid dat 'n swanger leerder vanaf die begin van week 32 van haar swangerskap met swangerskapverlof sal gaan en nie meer aan gewone skoolaktiwiteite en/of -klasse sal deelneem nie. Met hierdie maatreël wil die skool verseker dat die leerder in 'n veilige omgewing aan haar kind geboorte kan skenk, terwyl dit ook die ander leerders van die skool beskerm.
- 4.6 Indien die skool nie oor voldoende kennis van die gevorderdheid van die leerder se swangerskap beskik nie, en daar 'n redelike vermoede bestaan dat sy reeds 32 weke swanger is, moet die skoolhoof of sy/haar gedelegeerde senior vrouepersoneellid die bepalings in paragraaf 4.5 hierbo afdwing, in welke geval dit by die swanger leerder berus om die skool by wyse van 'n mediese sertifikaat van 'n erkende mediese praktisyn anders te oortuig. Indien sodanige leerder die skool wél anders oortuig, sal die bepalings van paragraaf 4.5 hierbo afgedwing word sodra sy 32 weke swanger is.

- 4.7 Die swanger leerder moet voorts kennis neem dat paragraaf 13(i) van die Leerderaanwesigheidsbeleid onder meer bepaal dat dit van tyd tot tyd onwenslik kan wees vir haar om skool by te woon, onder andere indien dit na die skoolhoof se mening in die leerder se belang óf onvermydelik is dat sy eerder tuisbly.
- 4.8 Die swanger leerder moet dus daarop let dat die skoolhoof bogenoemde diskresionêre bevoegdheid sal uitoefen indien hy/sy in enige stadium gedurende die leerder se swangerskap van mening sou wees dat dit hetsy in die leerder se belang óf onvermydelik is dat sy eerder tuisbly, selfs al is die leerder dalk nog nie 32 weke swanger nie, in welke geval die bepaling van hierdie beleid toegepas sal word asof die leerder reeds 32 weke swanger is.
- 4.9 Indien die tydperk vanaf 32 weke swangerskap tot die bevalling in 'n jaareindeksamen val, sal die skool die swanger leerder so ver moontlik probeer bystaan om wél haar eksamen af te lê.

Sodanige bystand is egter onderworpe aan die skool se vermoë, en kan slegs verleen word indien:

- 4.9.1 dit prakties moontlik is om die swanger leerder vir die hele eksamen op haar eie onder behoorlike toesig (verkieslik van 'n senior vrouepersoneellid) te laat eksamen skryf;
- 4.9.2 haar hele eksamen kragtens alle departementele voorskrifte oor toesig afgelê kan word; en
- 4.9.3 dit na die goeiddunke van die beheerliggaam nie teen die belange van die ander leerders van die skool indruis nie.

4.10 Indien die tydperk vanaf 32 weke swangerskap tot die bevallingsdatum in die swanger leerder se graad 12-eindeksamen val, sal die skoolhoof of sy/haar gedelegeerde senior vrouepersoneellid die leerder en/of haar ouers/voogde die moontlikheid bied om vrywillig as leerder van die skool te deregistreer en die eindeksamen as privaat kandidaat af te lê. Die administratiewe proses in dié verband sal deur die leerder en/of haar ouers/voogde self hanteer word.

4.11 Indien die swanger leerder nié hierdie proses wil volg nie, sal die skool die leerder so ver moontlik probeer bystaan om wél haar graad 12-eindeksamen af te lê.

Sodanige bystand is egter onderworpe aan die skool se vermoë, en kan slegs verleen word indien:

4.11.1 dit prakties moontlik is om die swanger leerder vir die hele graad 12-eindeksamen op haar eie onder behoorlike toesig (verkieslik van 'n senior vrouepersoneellid) te laat eksamen skryf;

4.11.2 haar hele eksamen kragtens alle departementele voorskrifte oor toesig in 'n graad 12-eindeksamen afgelê kan word; en

4.11.3 dit na die goeiddunke van die beheerliggaam nie teen die belange van die ander leerders van die skool indruis nie.

4.12 Sou die swanger leerder in enige van bogenoemde gevalle wél die eksamen by die skool skryf, geld dié reëling slegs vir daardie eksamen en nie vir enige ander skoolaktiwiteite nie.

4.13 Indien die swanger leerder wél die eksamen by die skool skryf, moet die bepaling van paragraaf 4.4 hierbo uitdruklik onder haar en/of haar ouers/voogde se aandag gebring word, en moet die leerder en/of haar ouers/voogde versoek

word om voldoende reëlings te tref dat behoorlike mediese hulp onmiddellik beskikbaar is indien die leerder en/of haar ongebore baba dit sou benodig.

- 4.14 Die leerder sal weer tot die skool en gewone skoolaktiwiteite toegelaat word slegs indien sy die skool van 'n sertifikaat van 'n erkende mediese praktisyn voorsien wat bevestig dat sy medies geskik is om dit te doen en in staat is om gewoonweg klasse by te woon.
- 4.15 Wanneer die leerder haar gewone skoolklasse en -aktiwiteite ná die geboorte van haar kind hervat het, mag die skoolhoof of sy/haar gedelegeerde senior vrouepersoneellid na gelang van omstandighede by die leerder oor die versorging en welstand van die baba navraag doen.
- 4.16 Die swanger leerder moet ook ingelig word van die moontlikheid dat sommige lede van die skoolgemeenskap nie noodwendig haar situasie sal aanvaar óf haar sal ondersteun nie, as gevolg van die bepaalde waardestelsel wat die gemeenskap aanhang.

## 5. Ouers en voogde se verantwoordelikheid

- 5.1 Die ouers/voogde van die swanger leerder sal versoek word om die leiding te neem en met die skool saam te werk ten einde die leerder te ondersteun en haar gesondheid en vordering te monitor.
- 5.2 Die ouers/voogde van die swanger leerder sal versoek word om stappe te doen om te verseker dat die leerder haar klastake, -opdragte en -werkstukke ontvang

indien sy weens haar swangerskap skool misloop, en dat voltooide take en werkstukke vir assessering aan die skool terugbesorg word.

## 6. Ondertekening van die swangerskapbeleid

### 6.1 Deur die ondertekening van hierdie swangerskapbeleid:

- 6.1.1 aanvaar die swanger leerder sowel as haar ouers/voogde dat die skool 'n opvoedkundige instelling is en nie noodwendig oor die nodige kundigheid, fasiliteite en ander hulpbronne beskik om mediese, sielkundige en/of ander dienste wat met 'n swangerskap verband hou, te verskaf nie; en
- 6.1.2 vrywaar die swanger leerder sowel as haar ouers/voogde die beheerliggaam én die skool onherroeplik teen die instel van enige aksie vir enige skade van watter aard of op watter grond ook al wat met die leerder se swangerskap en/of bevalling verband hou. Hierdie vrywaring sal 'n aanvang neem op die datum waarop die leerder swanger geraak het en sal voortduur totdat sy haar gewone skoolaktiwiteite ná die bevalling hervat.
- 6.1.3 bevestig die leeder en haar ouers/voogde dat sy bewus is dat by haar terugkeer tot die skool na die bevalling sy nie haar baba mag saambring skool toe nie.
- 6.1.4 bevestig die leerder en haar ouers /voogde dat skoolbywoning deur die swanger leerder op eie risiko plaasvind;
- 6.1.5 bevestig die leerder en haar ouers /voogde dat geen uitsondering vir die swanger leerder gemaak kan word met betrekking tot die nakoming van die Skool se gedragskode vir leerders nie;

6.1.6 bevestig die leerder en haar ouers /voogde dat hulle geen reg het om alternatiewe en/of addisionele logistieke reelings van die Skool te vereis nie.

7. Die skool se verantwoordelikheid

7.1 Ten slotte moet **Die Hoërskool Tygerberg** :

7.1.1 die swanger leerder ten sterkste aanmoedig om gedurende haar swangerskap sowel as ná die bevalling met haar onderrig voort te gaan;

7.1.2 verseker dat 'n klimaat van begrip en respek ten opsigte van onbeplande swangerskappe heers;

7.1.3 die swanger leerder in kennis stel dat hierdie beleid geensins as 'n strafmaatreël van enige aard bedoel is nie, maar dat die belange van die swanger leerder, haar ongebore kind, die skoolgemeenskap, die personeel van die skool, medeleerders sowel as andere hier ter sprake is en dus met die aanvaarding van hierdie beleid in ag geneem moes word;

7.1.4 'n register van leerderswangerskappe byhou; en

7.1.5 toesien dat 'n afskrif van hierdie beleid so spoedig moontlik nadat die betrokke leerderswangerskap aan die lig gekom het, aan die swanger leerder en/of haar ouers/voogde oorhandig word.

7.2 **Die Hoërskool Tygerberg** bevestig voorts dat hy besef dat die swanger leerder se rekord nie geskrap mag word omdat sy swanger geraak het of geboorte geskenk het nie.

Hiermee erken ek/ons dat bostaande swangerskapbeleid op \_\_\_\_\_  
volledig in oorleg met en by Hoërskool \_\_\_\_\_ met my/ons bespreek is, en  
dat ek/ons 'n afskrif daarvan ontvang het. Ek/ons erken voorts dat ek/ons op hoogte is van die  
inhoud van bygaande swangerskapbeleid, en dat ons daarmee akkoord gaan.

\_\_\_\_\_  
**LEERDER (Volle naam & handtekening)**

\_\_\_\_\_  
**DATUM**

\_\_\_\_\_  
**OUER/VOOG (Volle naam & handtekening)**

\_\_\_\_\_  
**DATUM**

\_\_\_\_\_  
**OUER/VOOG (Volle naam & handtekening)**

\_\_\_\_\_  
**DATUM**